

13

T 3149/3232.83

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1938

汾州府志

13

汾州府志卷之二十七

藝文一

漢文帝 詔

封宋昌壯武侯及官從臣九卿詔

方大臣之誅諸呂迎朕朕狐疑皆止朕惟中尉宋昌勸朕朕已得保奉宗廟已尊昌爲衛將軍其封昌爲壯武侯諸從朕六人官皆至九卿

唐太宗 詩

遊巖至迴鑾寺作

迴鑾遊福地極目玩芳晨寶刹遙承露天花近足春梵

哈佛大學漢和
圖書館珍藏印

鐘交二響法日轉雙輪寂爾真仙境超然離俗塵。

唐元宗詩

南出雀鼠谷答張說

雷出應乾象風行順國人川途猶在晉車馬漸歸秦背
陝關山險潢汾鼓吹頻草依陽谷變花待北巖春聞有
鷓鴣客清詞雅調新求音思欲報心迹竟難陳。

宋仁宗詔制批答

賜除宰臣文彥博讓恩命批答

朕躬儉約以先人而生民未足憂勤以勵政而百職多
隳豈布德之不明抑任人之弗至是以齋居正慮先志

後占鑿屢易以爲煩念難知之可慎永惟商周之所記
至以夢卜而求賢孰若用縉紳之公言從中外之人望
卿以舊哲比嘗相予惟字量能寬以服人惟純誠故久
而益信勲德兼著可以重朝廷忠信不回可以臨大事
夫謀於其始而既審則果於必用而不疑汝其欽哉朕
命無易所讓宜不允仍斷來章。

賜河陽三城節度使同中書門下平章事判河南府

文彥博加恩告勅詔

朕因孟冬之吉辰饗太宮而合食膺受神貺推行慶恩
眷惟同德之臣方處居留之任宜優異數少示眷懷既

敷告於外庭其往祇予休命

賜河陽三城節度使同中書門下平章事判河南府

文彥博辭加恩不允詔

朕屬者潔齊精誠薦見宗廟蒙神之貺受福孔多推慶
賜以大行均中外而咸及矧我同德乃時舊臣惟體貌
之隆宜加於異數而褒優之意未稱於予衷嘉讓節之
甚勤顧成命之難止所讓宜不允故茲詔示想宜知悉
除文彥博判大名府制

朕惟將相之崇資是爲文武之極選隆其名器所以重
朝廷列於藩宣所以屏王室矧乃居留之任必屬老成

之人爰擇剛辰敷告有位具官文彥博器閎而厚識粹
而明學得其方通古今而知要才周於物適大小以惟
宜自憤發於聲猷早更揚於中外居則參禪乎國論出
則宣暢乎皇威兩踐台司首當柄用賢愚式序舉百職
以咸修綱紀甚明贊萬幾而至悉自懇避鈞衡之任出
司管鑰之嚴逮此逾時蔚然休問眷言邦哲實簡予衷
是用更其擁節之榮委以別京之重勁兵所宿是資總
制之權雅俗惟淳兼賴撫綏之政於戲與國同體是爲
股肱之良惟民具瞻方隆師尹之望顧我舊德豈煩訓
辭往其欽哉祇服休命

宋英宗 詔制

賜樞密使守司空兼侍中文彥博不允手詔

省所奏伏覩詔書宰臣陳升之位。在臣之下者。願寢異恩。庶安孤跡。事具悉。卿翼亮三朝。周旋二府。國之耆舊。望寔素隆。升之任用。尚新甫登。宰席原其雅意。必欲推先。是用斟酌禮文。裁其宜稱。發於朕志。奚取常規。蓋以褒異老成。豈與例用爲比。卿謙恭久著。於此何嫌。往安乃居。毋逆朕命。所乞宜不允。

賜樞密使守司空檢校太師兼侍中文彥博乞退不允手詔

省所再上表乞罷樞府事具悉。卿器質方厚。謀猷明審。憂公盡忠。臨事能斷。越自仁祖。知卿美材。入輔出藩。於茲二紀。再冠台席。一總鴻樞。事功蔚然。洽於黎庶。任重道遠。卿寔有焉。朕負荷前烈。夙宵危懼。若涉大川。必憑舟楫。卿當悉心致力。以裨不逮。而何嫌何疑。遽求去位。封奏洊至。良用憮然。撫覽再三。殊失所望。老成之德。重於典刑。當體至懷。安居厥職。所請宜不允。

加文彥博食邑實封制

門下雖天子必有尊。所以嚴事上之訓。唯聖人能饗帝。所以昭報本之誠。朕祇紹丕基。肇稱元祀。禮文旣備。慶

賜誕敷眷惟心膂之臣。榦是機衡之任。共膺神貺。宜處衆先。具官文彥博。道茂國華。才推人傑。體忠厚以居德。壯謀猷而奮庸。弼亮三朝。周旋二紀。再司魁柄。仍冠中書。仗鉞臨戎。則兇渠折首。秉鈞調化。則黎獻承風。內外洵更望重。彌劭矧在纂承之際。親聞顧託之言。委寄至隆。眷注爲重。協贊盛儀之舉。克臻熙事之成。是用進美號。以褒功。取閒田而增邑。併伸異數。式示優恩。於戲。慮危於安。所以綏萬國。懷遠以義。所以靖四夷。益懋乃官。用副朕志。可。

宋神宗

詔制勅詩

封介之推潔惠侯勅

元豐元年

惟神之生。嘗以羈勒。從晉侯行天下。而不言祿。晉人思之。卒與其母隱死於深山。而不顧。可謂忠廉自信之士矣。則其歿也。宜爲明靈。血食於土。守臣來告。有禱必從。庶民之德。是不可以無報。錫命侯爵。神其享之。宜特封潔惠侯。

除文彥博樞密使賜功臣制

天極環樞。上通帝位之紀。神兵會府。內嚴師律之謀。朕方垂講。丕平。進經常武。雖天下無事。思備禦之不敢忘。蓋王者有征。視安危之不敢忽。適登髦傑。資以輔予。具

官文彥博器閎而深才敏以濟早賁賢人之業寔膺聖考之知以忠孝之名形家國之盛節以文武之畧輯將相之大猷肆纂命於皇圖迺離憂於喪紀迨終哀戚甫見儀刑屬疆事之方興煩師旄之載舉折衝境外方將出憺於王靈收畫幄中曷若坐圖於廟勝宜長機廷之務宜符巖石之瞻於戲過餌北戎未厭貪驕之志再盟西夏猶苞狂忽之圖終佇奇勲用恢遠馭

除文彥博守司空依前樞密使加食邑實封制

朕若稽先生維御羣品左謀金鉉之老以經治於廟堂右屬鴻樞之良以定策於帷幄厥有成績可勿褒乎具

官文彥博風力肅明器資恢傑臨至劇有轉圜之易定大謀如執玉之堅逮事神文之廟已緝熙於鼎路追言聖考之遇又密勿於機廷肆涼昧之不承會精神於羣慮雖兵民之異本亦文武之交修未隆贊冊之恩曷懋圖庸之舉其保宏父允釐華陽顧豈明分之私終繫老成之助於戲有若闔天尚迪文王之彝罔俾阿衡以專商家之美徃篤爾烈永承於休

除郝質殿前都指揮使安武軍節度使加勲食邑實

封制

國家統御之勢大維持之業隆外倚四巖藩翰之臣中

謀萬夫貔虎之帥。故奉委裘而羣情固聞。受瑁而三靈趨。肇臨發政之辰。首下攷朝之命。具位郝質。性資莊厚。氣畧沉雄。通玉帳之善經。體金行之正氣。自昔先帝。知爲勁臣。因其勤舊之名。立在親信之地。會綴衣之陳牖。提衛甲之環宮。曾無夜釐之譁。自得剛牙之重。紹帝符於景祚。渙邦號於前彝。視秩冠於文昌。徒節臨乎安武。加以總正。使範敦封。并旌巖陞之勞。以表師干之寵。於戲。天之壁壘。象在羽林。王之瓜牙。職於圻父。蓋地嚴則必資拱扈之力。師衆則猶賴訓齊之方。往堅壯圖。思答殊遇。

除文彥博司徒判河南制

秉國大鈞。絕席廟堂之上。經時常武。運籌樽俎之間。維吾老臣。多所更踐。懇辭幾務。往殿近藩。敷告於廷。進疇厥位。具官文彥博。器質閎偉。智謀靖深。逮事祖宗。早登丞弼。周旋左右。當四海之具瞻。密勿樞機。寔萬邦之爲憲。肆予纘御。屬在倚毗。深惟注意之勤。勉徇均勞之請。眷言耆舊。宜所褒崇。增秩上公。衍封真賦。光華故里。揭全晉之旌旄。偃息名城。壯陪京之屏翰。出入中外。始終顯榮。於戲。進而論道。經邦則必告嘉猷。於后。退而承流。宣化則必下膏澤。於民。爾惟欽哉。尙多受祉。

賜太師文彥博詩詔

四紀忠勞著三朝聞望隆享茲難老祉報在不言功富
矣勲彌大居焉貌甚冲西都舊士女白首竚瞻公
勅彥博卿在祖廟蚤冠三事懷忠奮策迄有大勲來觀
外廷相成宗祀崇進公品往蒞洛師錫燕賜詩詔示殊
禮仍勅近輔序而識之庶傳無窮著見賢業其承朕志
體服眷恩今賜卿詩序至可領也故茲詔示想宜知悉
冬寒卿比平安好遣書指不多故

元豐三年季秋皇帝行大饗之禮於明堂方守魏
被召侍大禮慶成後四日特蒙制恩進位大尉係
釐洛郊臣犬馬之年七十有五前此累年章十數
上以求致仕聖恩俯憐舊物曲念老臣皆未之許
今復優進公位俾守別都自顧衰殘非敢當克俯
伏辭避至於再三訖不獲命乃以閏月二十三日
陞辭翌日出都仍賜宴於瓊林苑以二府大臣押
伴既有臨遣中使內出寶器俾酌天醴以極魚藻
之樂及賜御詩以寵其行臣伏思蒙厚恩荷殊渥
自近世逮本朝以來未有此比則有弼臣惇奉詔
作序事義詳矣臣雖窮極語言不能盡意惟知負
戴天地生成之德感極而繼之以泣惟陛下聰明

睿智煥乎有文帝庸作歌光昭前典伏自臨御以
來十有四載而英韶之韻雲漢之章百執願聞萬
物思睹者久矣曾未之得夫何老臣首蒙天賜至
榮至幸超絕等倫始至都門則已傳布於宮省尋
抵洛宅又得誇示於吏民是用圖金石刻以永其
傳將與夫日月並明天地同久復使臣之子子孫
孫相繼率勵保之守之亦克永世老臣爲不朽矣
元豐四年正月三日文彥博謹記

宋哲宗 詔制批答

除文彥博平章軍國重事制

師傅道之教訓先王所以迪厥官老臣重以典型天下
所以資其智廼瞻舊德時謂元勳謀合祖宗之心名載
鼎彝之器申效贊策播告外朝河東節度管內觀察處
置等使守太師開府儀同三司太原尹致仕上柱國潞
國公文彥博惇大而清明方嚴而信厚出則秉乎旄鉞
入則總我鈞衡文武兼備其才夷險能致其力畢公之
彌四世三紀於茲傳說之總百官萬邦其又爵隆無富
溢之累名遂有身退之榮神明相其壽康人心想其風
采是用還之論道倚以經邦以帝者之師臣謀議廟堂
之上以天下之大老制馭夷狄之情庶幾有爲底於極

治陪敦多井申衍真封於戲呂望惟賢起佐文王之治周公已老留爲孺子之師矧我耆英無愧前哲徃宣一德用格多盤

賜太師平章軍國重事文彥博宰相呂公著自今後入朝凡有拜禮宜竝特與免拜詔

朕聞几杖以優賢著之典禮耄耄無下拜書於春秋魏太傅鍾由以足疾乘車就坐自爾三公有疾以爲故事而唐司徒馬燧亦以老病自力對於延英詔使毋拜今吾耆老大臣四朝之舊德隆而望重任大而憂深者唯卿與公著而已方資其耆龜之告豈責筋力之禮今後

入朝凡有拜禮宜竝特免卿其專有爲之報畧無益之儀毋或固辭以稱朕意

賜太師文彥博辭免不拜恩命允批答

朕優禮師傅達德齒之尊以亟拜爲可畧古之道也卿謹嚴朝廷明君臣之分以不拜爲未安禮之節也道竝行而不悖義有重而難移勉循所陳不忘嘉歎

賜太師文彥博乞致仕不許批答

卿出入四世師表萬民無羨於功名而有厭於富貴其所忘身徇國捨逸就勞者豈有求而然哉凡以先帝之恩生民之故也卿之在朝如玉在山如珠在淵光景不

陳而草木自遂去就之際損益非輕昔西伯善養老而太公自至魯繆公無人子思之側而長者去之卿自爲謀則善矣獨不爲朝廷惜乎藥餌有間時遊廟堂家居之樂何以異此

賜太師文彥博乞致仕不許斷來章批答

爲君難爲臣不易非吾推誠無疑不能起卿於安佚非卿忘身徇國不能從我於艱難召用之初中外相慶搢紳莫不競勸父老至於涕流中道而歸其義安在宜思一身之樂輕於社稷毋使庶人之議及於朝廷

賜太師文彥博乞致仕不允斷來章批答

君子安身崇德如山嶽之鎮開物成務如江河之流若山嶽之鎮搖動不安江河之流行止自便則物將交病人亦何觀朕之望卿無以異此宜守不移之志以成可大之功

賜太師文彥博生日詔

陽月載臨剛辰協吉篤生元老弼亮四朝允爲廊廟之華豈獨閨門之慶往膺寵數永錫壽祺

賜太師平章軍國重事文彥博上第一表乞致仕不

許批答

昔師尚父九十秉旄杖鉞猶未告老此諸葛元遜所以

屈張昭也。而衛武公百年猶箴儆於國。曰毋以我老耄而捨我。此左氏倚相所以誨申公也。今卿壽考康寧而退托衰病。自引求去。獨不念天下之士有如彼二子者。議其後乎。姑安厥位。以答公論。

賜太師文彥博上第二表乞致仕不允批答。朕聞之。成王之政。周公在前。召公在後。畢公在左。史佚在右。四子挾而維之。目見正色。耳聞正言。一日卽位。天下曠然。未聞四子以老而求退。亦未聞成王以老而聽其去也。朕雖不德。猶庶幾成王之治。卿雖老矣。獨不能以四子之心爲心乎。勉卒輔朕。無愧前人。

除文彥博太師河東節度使致仕制

周公未嘗之魯。老亦居豐。留侯晚雖彊飡。終不任事。蓋委寄之重。初無間然而止足之風。所不敢廢。惟我耆舊。歷事祖宗。纘服之初。復命以位。雖師保之地。優佚不煩。而邱樊之心。朝夕以請。布告在位。俾聞高風。太師平章軍國重事。上柱國潞國公文彥博。克孝而忠。允文且武。其在師旅。有方召之勲。其在朝廷。有崇璟之業。士民視其去就。夷狄震其威名。時更四朝。躬蹈一節。先皇帝愍勞以事。旣許其歸。越予訪落之年。凜有涉淵之志。起之旣老。待以仰成。出入五年。終始全德。進而論道。日聞典

汾州府志 卷二十一
訓之言倚以折衝卒靖邊防之警委成功而不處指暮
景以求安動請屢闢誠心莫奪顧瞻閭井近在洛師郭
氏有永巷之嚴裴公有綠野之勝豈以簪紱之累久致
形氣之勞貴極上公既無復加之爵秩分領全晉仍畀
久還之節旄增廣舊封益衍真食殫盡人臣之寵歸從
父老之游於戲音聲不遐尚有就問之禮几杖以俟復
斯親祀之陪勿以進退之殊而廢謨猷之告式燕且譽
俾壽而康

明成祖 勅

勅慶成王濟炫永和王濟烺

永樂十二年八月十二日皇帝勅姪慶成王濟炫永和
王濟烺朕念爾父骨肉同氣至親前令爾兄弟往汾州
權住勅至卽收拾不數日前去汾州權住

明宣宗 諭書

諭慶成王美靖

宣德八年閏八月初五日皇帝書諭弟慶成王美靖得
奏欲存留本府隨侍軍校該發回原籍餘丁供給使用
已勅兵部準王存留王其知之故諭

書復永和王

宣德八年九月初五日皇帝書復叔永和王所言欲將

本府軍校該發回原籍餘丁存留供給使用已勅兵部俱從所言人回專此以復惟叔亮之。

明英宗 勅

旌汾州義民王志可勅。

正統二年九月十五日皇帝勅諭山西汾州民王志可國家施仁養民為首今之守令或不能奉承有厲民者而所在姦民豪奪鄉里以肥其家恬不知愧爾於饑歲乃能出穀豆一千石用助賑濟有司上聞朕用嘉之今遣官齎勅旌爾為義民勞以羊酒仍免本身雜汎差役三年尚允蹈忠厚表勵鄉俗用副朝廷褒嘉之意欽哉

故勅

明武宗 勅諭祭文

諭都察院右副都御史高崇熙勅

今命爾巡撫四川兼理松潘安綿建昌等處邊備撫安兵民總理糧餉修理城池器械操練兵馬現今保寧江津等處殘賊復聚為患爾一面會同總兵官楊宏征剿藍五等餘黨一面公同副總兵王憲剿殺江津強賊朕念彼處地方四年用兵軍民困憊已極爾須加意撫卹設法賑濟存問疾苦寬釋脅從禁約所屬官吏不許擾害貪剋公廉有為者以禮獎勸貪酷不才者依法懲治

汾州府志 卷二十七
應奏請者指實叅奏。或有獄訟不平。卽與申辯。屯田水利等項。俱要用心整理。凡事與鎮守等官計議而行。事有便於軍民者。俱從宜處置。事情重大者。具奏定奪。其撫剿松潘番賊事宜。須公同鎮守總兵巡按及督同叅將兵備都布按三司等官。從長計議。酌量處置。務在計慮周密。區畫停妥。軍情一應機宜。悉聽便宜。從事叅將而下。俱聽節制。其賑濟一事。照依戶部近日題奏事理。着實舉行。務使民沾寔惠。不許虛應。故事各處盜賊寧息之日。爾仍多在松潘駐劄。不許專駐省城。自圖便安。其安綿建昌等處邊計。照舊督理。播州土官讐殺事情。

會同各官處置。務在得宜。不許因而顧此失彼。爾爲風憲大臣。受茲委託。須盡忠竭力。展布猷爲。務俾威武振揚。地方寧靖。以紓朕西顧之憂。毋或因循苟且。及處置乖方。自貽咎責。爾惟欽哉。故諭。

諭祭都察院右都御史高崇熙文

維正德十一年歲次丙子四月壬子朔越七日戊午。皇帝遣山西布政司王軌諭祭於都察院右都御史高崇熙。曰。爾性資敏達。器宇魁梧。發跡賢科。擢司風紀。歷官藩臬。綽著能聲。晉佐都臺。往撫西蜀。時因盜起。受命臨戎。捷報旣聞。賊氛復熾。事出不意。遂致人言。方在申誣。

汾州府志 卷二十一
胡遽淪沒。訃音忽至。良可悼歎。宜加卹恩。賜以諭祭。九
泉不昧。尚克承之。

諭都察院右僉都御史車寔勅

今命爾巡撫宣府等處地方。整飭邊備。訓練軍馬。防禦
賊寇。務先撫卹士卒。養其銳氣。俱要衣甲整齊。器械鋒
利。城堡墩臺坍塌。以時修治。堅完官軍騎操馬匹。責令
隈養臙壯。仍督理屯田糧草。并預備倉糧。其錢糧出納
之際。尤須關防嚴謹。不許官吏人等侵欺作弊。禁革管
軍頭目不許科剋下人。及私役耕種。職官有犯。輕則量
情懲治。重則送巡按御史。并彼處問刑衙門。問理。應奏

請者。叅奏處治。若內外官員。及權豪勢要之人。有侵欺
盜賣糧草。及阻撓屯種等項者。指實奏聞。凡一應軍機
邊務。須與鎮守總兵等官。從長計議而行。分守叅將。遊
擊等官。俱聽節制。凡有益於邊備。有利於軍民者。聽爾
便宜處置。爾爲風憲重臣。尤宜持廉秉公。盡心職業。務
令邊備修舉。糧廩充實。軍民得所。地方無虞。庶不負朕
之委託。爾惟欽哉。故諭。

諭祭都察院右僉都御史車寔文

維正德十二年歲次丁丑十月癸卯朔越十五日丁巳。
皇帝遣山西布政司諭祭於都察院右僉都御史車寔

曰爾發跡賢科擢官郎署明刑西部積有餘年出守名邦屢聞嘉績載參藩政益著英聲遂由苑寺之卿晉拜都臺之秩風紀方期於委任急流中懇於退休既遂優閒宜膺壽祉胡然一疾遽爾長終追念往勞特賜諭祭爾靈如在尙克歆承

明世宗

勅諭慶成王奇湏

嘉靖七年二月二十一日皇帝勅諭慶成王奇湏朕惟爲人子者要竭其力以孝於親乃人倫第一善行爾奇湏乃慶成溫穆王之子素聞先人之教乃得此不易之

名近該禮部覆奏先因都御史江潮奏爾孝行云爾自幼事父不離左右飲膳必親供定省不違者二十餘年及父薨逝哀毀踰禮幾不能生披跣送喪兩足皆腫欲廬墓側衆勸始回別居一室足跡不至寢門母妃陳氏患瘡自吮膿以驗甘苦凡母疾朝夕侍側藥必親嘗夜則禱神願以身代母疾果愈後居母喪亦如爾父遂行有司勘審明白皆如初奏朕一聞之衷懷稱歎夫如上述述之事人以爲難爾獨能之寔由爾天性純懿氣質清奇故能專務孝德以率諸仁義深惟罔極而時刻無忘此乃古今所罕聞常人所難蹈故朕深加喜悅特賜

書旌獎命行人司行人岳倫兼持白金彩幣羊酒之物
往諭以彰爾孝行之卓異冀以風勵乎諸親爾可益持
乃志堅其孝誠推之以事上移之以弟長以至修身齊
家率遵先人之教勉副朕所著誥辭庶於孝德愈有光
焉則天地鬼神莫不鑒護膺祿位於無窮輔皇基於億
載福衍康寧慶延後世與國同休顧不嘉歟於戲凡吾
宗親可不以是爲法乎朕述此數言用伸崇禮孝子之
意且以見朕嘉獎之誠爾惟欽哉故諭

書與慶成王奇湏

嘉靖十年正月二十二日皇帝書與慶成王奇湏茲者

南郊禮成大頒恩詔朕念王政先於老老仁民始於親
親惟王宗室懿親壽邁七十恩澤覃布所宜加隆茲特
以羊酒幣帛令本府進表官員順齋存問以見朕優禮
之意專書以達惟王亮之

勅諭慶成王奇湏

嘉靖十一年十一月初八日皇帝勅諭慶成王奇湏近
該鎮國將軍奇洪等各奏稱王行年八十五世相見同
居乞要照例旌異惟王平日積善餘慶致此親睦良可
嘉尙况前此以王孝行卓異已經降勅旌獎茲再遣官
齎勅褒諭以風勵諸藩王宜益敦善行以永終譽顧不

美歟欽哉故諭

勅諭永和安簡王長子新墀

嘉靖二十九年十月二十三日皇帝勅諭永和安簡王長子新墀近該巡撫都御史應檟等奏稱爾嗜學好禮敦彝睦族居喪哀毀賢孝可嘉茲特降勅差官獎勵表揚爾宜益懋前修以永終譽

勅諭慶成王表樂

嘉靖三十四年十二月十五日皇帝勅諭慶成王表樂近該山西巡按官差稱王仁孝謙和謹言慎行樂善循理睦族親賢年登八旬修持愈篤四世相見餘澤有孚

良可嘉尚茲特遣官齋勅褒諭以風勸諸藩王宜益敦懿行迓承壽祉欽哉故諭

勅諭慶成王府鎮國將軍奇漆夫人王氏

嘉靖三十九年七月初三日皇帝勅諭慶成王府鎮國將軍奇漆夫人王氏近該巡按山西官奏稱爾事姑以孝卹孤以慈守節彌堅善行昭著乞要照例獎勵事下該部議覆相應茲特降勅差官往諭以彰爾賢爾尚服思寵榮益延壽祉欽哉故諭

諭祭兵部左侍郎謚襄敏張珩文

嘉靖四十年四月甲子朔越二十四日丁亥皇帝遣山

西布政司堂上官右叅政祝天保諭祭原任兵部左侍郎張珩曰惟爾志行端方器識宏遠早登科第簡任內臺南僕叙遷旋佐棘寺薦陟都憲載貳夏卿晉秩臺端敷歷中外盡心邊事累立戰功終制家居方期委用云胡遽逝良切悼傷追念往勞特頒恩卹諭祭營葬稽行易名爾靈有知尙其歆慰

諭山東按察司副使曹科勅

今特命爾整飭天津等處兵備專在天津滄州二處往來住坐自天津以南至德州止并河間滄州軍衛有司衙門悉聽管轄務要不時巡歷操練軍馬修理城池禁

革奸弊督捕盜賊問理刑名兼管河道其德州河間軍衛已有守備專一管理操練爾不必遠地干涉遇有盜賊生發卽督調應捕官軍民快人等相機剿捕毋令滋蔓河道淤淺仍與巡河御史管河郎中等官從宜處置疏濬以便糧運及官軍人等船隻毋致疎處阻滯一應軍民詞訟應受理者卽與問理所屬官員有怠惰貪虐不職者輕則量情懲治重則聽爾拏問及奏聞區處捕盜事情有應與霸州兵備官通州分守官議處者協和計議停當而行仍聽經該巡撫提調都御史節制其河間等衛原有安插土達亦須嚴加鈐束撫恤關防有警

隨卽調用爾爲憲臣受茲簡命尤須持廉秉公正已率下振揚風紀預防寇盜務使軍民安妥地方寧靖斯稱委任如違責有攸歸爾其勉之慎之故諭

明穆宗

勅諭慶成王府鎮國中尉表榘

隆慶三年十月二十九日皇帝勅諭慶成王府鎮國中尉表榘近該山西巡按官題稱爾樂善好學端謹自持年逾七袞始終一致宗黨咸稱其孝州志嘗紀其賢乞要旌獎該部議覆相應茲特賜勅獎勵以爲宗藩之勸爾尚益篤善行永保令名故諭

諭巡鹽監察御史張更化勅

近該浙江巡撫官題稱浙西杭嘉湖與直隸蘇松等府均爲國家財賦之地水利所係甚重乃今遭懼水患民瘼攸關要將浙直二水利事務併令巡鹽御史一體兼理該部議覆相應今特命爾不妨原務兼管蘇松常鎮四府及杭嘉湖各府地方水利在浙江則行水利道在直隸則行兵備道爾須查照先今該部題準事理往來督率各該司道及各府州縣掌印官責令水利官帶同塘長人等躬親相度考究原委要見某處係上游水匯某處係下流支港應分某水以殺其勢應闢某岸以緩

其衝應濬某湖以會其流某處陡閘應修某處塘堰應築合用人工隨宜區處其劉家河黃浦七浦白節其緊要河港湖匯併浙直交界處所有未經開通及已開仍欠深闊與夫塘堰涇瀆陡門閘壩等項應修應濬應復舊應新置者通勘估計議處如一圩之中塘岸溝池等項不煩多費者卽令得業之家量田多寡出力修濬果係工力浩大動支洶河等銀應用如再不敷會同撫按官從長計處撫按亦要悉心遠計務求共濟不得推諉其該道并府州縣掌印水利等官敢有怠玩誤事若勢豪之家侵塞水利姑令首正免罪敢有隱瞞及違拒阻

撓者卽行拿問干礙職官指名叅奏其水利官營求別差隳廢職業或需索常例利已病民應拏應叅並聽舉行如例每年終將修濬過緣由造册奏繳復命之日仍將所屬大小官曾否有益水利照例舉劾以昭勸懲爾爲憲臣受茲重委須夙夜殫心務俾水利興舉旱澇有備以爲益國便民之計如或因循苟且虛應故事責有所歸爾其欽承之故勅

諭山東按察司副使劉有誠勅

臨清係水陸要衝之地軍民雜處客貨叢聚往往有豪橫詐僞之徒恃勢肆奸善良受害所在有司不能禁戢

又邇年各處流民衆多一遇饑饉公行劫掠貽患非小今特命爾專一分巡臨清地方問理刑名整飭兵備兼理馬政并管河道保固城池操練軍馬撫卹士卒禁捕盜賊查考倉糧革除奸弊并管轄東昌府所屬高唐聊城夏津武城清平茌平博平堂邑館陶冠縣莘縣恩縣邱縣兗州府所屬東阿平陰陽穀壽張等一十八州縣及境內衛所一體管理仍聽巡撫并提督河東軍務都御史節制所在軍衛有司官員如有貪財黷貨生事害人及縱容盜賊不行緝捕等項違法者輕則量情處治重則叅奏拏問爾爲憲臣受茲委任尤須持廉秉公正

已率下毋或曠職廢事自取罪責爾其勉之慎之故勅

諭陝西按察司副使劉有誠勅

朕惟自古帝王治天下者率以興學育材爲首務而學校之興廢人材之盛衰世道之隆替係焉此蓋已然之明驗也今特命爾往陝西巡視提督各府州縣儒學爾其欽哉夫總理一方之學校是卽一方之表率也然率人以正必先正己爾其務端軌範嚴條約公勸懲俾爲師爲弟子者一崇正學迪正道革浮靡之習振篤實之風庶幾儲養有素而待用不乏斯足以稱簡任之意如或因循歲月績效弗彰朕將爾責焉爾其勗哉所有合

行事宜申明條示於後其慎行之毋忽故諭
明神宗

勅諭慶成王慎鍾

萬歷十二年八月二十日皇帝勅諭慶成王慎鍾朕以
元祥大慶恩渥渙頒肆推宗室之賢特舉旌揚之典近
該山西巡按官題稱王敦倫盡孝樂善親賢明道義而
祖訓克遵端表率而郡宗咸服朕甚嘉焉茲特賜勅獎
勵以彰有德庸勸諸藩王宜益敦素履永保令名茂揚
睦族之休風無負展親之至願欽哉故諭

諭都察院右副都御史王緝勅

今特命爾巡撫江西南安贛州福建汀州廣東南雄韶
州等府及湖東柳州地方提督軍務撫安軍民修理城
池禁革奸弊一應地方賊情軍馬錢糧事宜小則徑自
區畫大則奏請定奪其餘民情事務不須干預爾常在
汀贛二府駐劄不時往來於汎地巡視但有盜賊生發
卽便嚴督各該兵備守備守巡并各軍衛有司設法剿
捕所屬官兵鄉兵務要嚴加選練軍衛有司官員有不
職者文官五品武官三品以上照例叅奏其餘俱許徑
自拏問發落如在軍前違期逗遛退縮者聽以軍法從
事生擒盜賊鞫問明白亦聽斬首示衆事有應與各該

鎮巡官計議者須計議而行爾受茲重任須殫忠竭力以副委託如或處置乖方及致他虞罪有所歸爾其欽承之毋怠毋忽故勅

諭南京戶部右侍郎王緝勅

今特命爾不妨部事帶管總督南京各倉并象馬各草場收支一應糧草嚴督監管郎中員外主事御史於收放之際務要關防慎密出納分明不許忽畧疎失致生奸弊如遇倉場墻廩損壞隨即量撥軍夫修理其監管收支官員并倉官人等但有侵欺作弊及巧立名色濫罰米物等項除文職五品以上并軍職具奏拏問其餘

輕則量情責罰重則就便提問如有官豪勢要之人干預攪擾爾卽指實奏聞處治仍監督南京各衛屯田比較子粒其清出撥軍田地若有仍前侵占及屯軍恃強奪占民田者卽與究治剖斷下屯官軍亦不許別項差占有妨農務在外各省司道府州縣掌印管糧等官徵解依期者照例舉獎怠玩廢事者叅究提問爾受茲重委宜持廉秉公除奸革弊圖稱厥職毋或乖違怠弛自取過愆爾其勉之慎之故諭

諭湖廣布政司右叅政兼按察司僉事張更化勅
今特命爾分守上荆南道駐劄澧州撫治流民聽理詞

訟兼整飭岳州九永等處兵備督理軍衛有司選練兵馬修葺堡隘彈壓苗人務要不時巡歷所轄地方仍選差員役遠爲哨探遇有大小苗人擾犯卽督兵相機撫剿敢有不用命者卽以軍法處治仍聽巡撫官節制爾受茲委用須持廉秉公正已率下務俾苗人斂戢地方平寧斯稱任使毋得怠玩曠職自取罪愆爾其勉之慎之故諭

國朝

世祖章皇帝

諭祭贈太僕寺卿汾州府知府 臣 黃廷柏文

烈士酬知寧捐軀而靖節忠臣報國無含義以全生爾山西汾州府知府黃廷柏貞毅銘心直方著行值小蠢之變血戰不屈遂隕命鋒鏑以全厥志可謂見危授命視死如歸者矣所司上聞深用憫悼特賜祭一壇造墳安葬以表英魂爾靈不昧尙歆承之

諭祭浙江道御史 臣 張煊文

舍生者臣子之誼卹死者朝廷之恩特沛龍章追光馬鬣爾浙江道御史加一級張煊秉心霜肅論事風生馳去烏臺壯披丹而入告鶴歸華表嘆化碧以非辜躋幽秩於清卿庶酬素志寵遺昆以膺仕用慰輿情特賜祭

汾州府志 卷二十一
一壇給與全葬桂餌椒漿少釋九原之痛豐碑宿草長
昭三錫之榮爾靈有知尙克歆享

聖祖仁皇帝

御書文廟額

萬世師表

各省府州縣
胥行頒發

御書賜汾州府知府

臣沈寧

桃紅復含宿雨柳綠更帶朝煙花落家童未掃鳥啼山
客猶眠

御書賜汾州府通判

臣韓開藩

雞鳴紫陌曙光寒鶯囀皇州春色闌金闕曉鐘開萬戶

玉階僊仗擁千官花迎劔佩星初落柳拂旌旗露未乾
獨有鳳凰池上客陽春一曲和皆難

御製詩賜臨縣知縣

臣李芑

雜詩之二

桃花歷落李花開綠柳含煙傍水隈鴻鴈平沙看不盡
春光曖曖入蓬來

勅諭都察院右副都御史

臣于成龍

茲命爾巡撫直隸等處地方管轄紫荆密雲等關隘贊
理軍務兼理糧餉駐劄保定府專理該管地方舉核文
職賢否糧餉刑名一切民事爾宜宣布德意撫安人民

約束衙門員役使之恪遵法紀毋致作弊生事擾害兵民操練兵馬修濬城池詢訪民瘼禁戢奸頑其衛守備守禦所千總衛千總經管錢穀領運漕舡仍照舊聽爾統轄所屬地方應徵應免錢糧皆照戶部題過新定經制遵行曉諭仍細加體察如有司各官朦朧重收借端科派叅奏處治嚴飭所屬察解逃人督理屯政河間府至通州一帶河道須督各道屬州縣勤加疏濬使漕運通便長蘆等處鹽政並宜廉飭期於鹽政無滯又密雲等關隘不許擅立關稅侵擾商民嚴禁權豪勢要侵人田地堯攬糧草蠹耗軍需天津一帶海口重地尤宜接

聯防備沿海烽臺設法嚴察不得廢弛備造運艘製辦火藥器械如地方寇賊生發卽會同總兵官計議統率將領戮力擒滅務盡根株凡地方利弊有可蘇息民困振飭維新者逐件條奏請旨施行地方備儲之計如常平社倉等事責令有司力行備舉境內逃丁荒糧責成道府轉行有司從實察核造冊開報應蠲豁者一面曉諭招徠勸課農種嚴禁濫徵侵佔使民人樂業毋容有司將現存人戶概派包賠以致重累黎民所屬司道以下各官果有真心任事廉能著效者卽據實舉薦如粉飾欺僞貪酷殃民庸懦溺職者不時叅奏副將以下武

職聽爾節制并該管防守地方勦禦賊寇提調兵馬舉
劾武職賢否一切軍務俱會同總兵官行如有武官騷
擾地方攪害良民縱兵搶掠及隱匿賊情不報等事聽
爾會同總兵官糾叅從重治罪勅中開載未盡事宜聽
爾詳酌施行年終將行過事蹟及兵餉錢糧造冊送部
察考爾受茲委任須持廉秉公殫心竭力以副委任如
怠玩廢弛貪黷乖張貽悞地方責有所歸爾其慎之故
諭

御製詩賜直隸巡撫臣于成龍并序

直隸巡撫于成龍秉性醇樸廉介夙聞朕心嘉賴俾典

節鉞保釐畿輔性能激濁揚清始終如一清潔之操白
首彌勵真國家之可重人所不能也茲來陛見爰賜以
詩用示鼓勵之義且以風有位焉

自昔崇廉治勤思吏道澄郊圻王化始鎖鑰重臣膺政
績聞留犢風期素飲冰勗哉真晚節褒命日欽承

勅諭兵部尚書兼都察院右副都御史臣于成龍

茲特命爾總督江南江西等處地方軍務兼理糧餉操
江駐劄江寧府居中調度宣布德意收拾人心嚴飭文
武官吏修濬城池簡閱器械稽察奸宄查解逃人設險
固防修理戰艦操練兵馬裕儲核餉信賞必罰弭盜安

民一應戰守機宜悉聽便宜區處誠諭文武將吏共圖保障該省巡撫提督等官聽爾節制如有賊寇生發卽應指授方畧督率提督鎮將等官戮力勦滅毋使滋蔓仍申明紀律禁約官兵使所過地方秋毫無犯賊若悔罪棄戈真心歸順者準與招撫安插依山據海負固不服者設法招撫務須區處得宜如招撫事體重大奏請定奪內地小盜嚴責各汛防官及州縣衛所印捕官員緝擒有隱匿賊情不報者卽行糾叅從重治罪如有鑽投文武各衙門充爲標員吏役暗通賊信及潛出行劫者其濫收官員不分守土駐防糾叅重處大兵出征往

來境上須行各該有司將糧草船隻預先備辦應時支給毋容州縣衛所橫徵科派苦累窮民該省官兵各有統轄爾須與統領官及巡撫提督等官計議而行有不法擾民者依法處治駐防滿洲兵丁如有擾害百姓妄行生事者爾會同該管官審問嚴行治罪軍資糧餉應行支給事竣察核漕糧船隻沿河撥兵護送毋致疎虞其兵馬實數向係道臣查點今停其查點爾督同提督選擇武官內廉幹者查點如有虛冒卽行指叅有與各督撫相關者必會同酌議施行鄰省如有兵事移會務須倚角策應爾猶須正紀率屬所統文武大小官員必

常加申飭令其約束衙門官役俾一遵法紀罔敢作弊生事擾害軍民用兵之際稽遲糧餉違悞軍機或臨陣退縮殺良冒功及借軍剝民侵餉肥己者文官六品以下武官四品以下會同巡撫提督以軍法從事巡撫提督鎮道等官飛章參奏候旨處分所屬文武官員一秉虛公嚴行甄別有實心任事廉能著效者卽據實舉薦貪殘庸懦輕則降黜重則拿問其疏奏聞興利除害有裨地方事宜勅中開載未盡許便宜區處爾應茲重寄須持廉秉公據忠殫力俾盜賊屏息地方寧謐斯稱委任如因循怠忽_治處置乖方致悞重地責有所歸爾其

慎之故諭

御書額聯賜兩江總督謚清端臣于成龍

高行清粹

歷仕甘棠隨地蔭兩江清節至今傳

御製太子太保兵部尚書兼都察院右副都御史總督江

南江西等處地方軍務兼理糧餉操江謚清端于成

龍碑文

朕讀周官六計弊吏廉善廉能廉敬廉正廉法廉辨吏道厥惟廉重哉朕用是審觀臣僚有真能廉者則委以重寄錫以殊恩所以示人臣之標準也爾于成龍秉心

樸直蒞事忠勤而考其生平廉爲尤著以故累加特擢
皆朕親裁蓋拔自庶官之中游授節鉞之任爾能堅守
夙操無間始終古人脫粟布被或者嫌於矯僞爾所謂
廉本於至誠聞爾之風可以興起乃不憚遺忽焉奄逝
日者省方察吏南及江表採風謠於草野見道路之謳
思清德在人於今不泯惟爾之廉天下所知朕俯合輿
情載褒勁節旣考名副實謚曰清端葬祭以禮又晉之
崇秩賜予有加恩卹爾子於戲人臣行已服官事主之
道爾可謂有始有卒者矣顧不可以風世也與康熙二
十四年三月十五日

諭祭兩江總督謚清端

臣

于成龍文

二道

朕惟國家敷治簡賢道先保障人臣奉公奏最節重清
勤苟四知之克嚴歷終身而弗替寵褒宜賁恩卹用昭
爾于成龍志篤醇誠誼敦貞介甫膺民社聿著循聲旣
懋旬宣彌彰令績是用畀以節鉞綏乃邦畿爾克撫字
維勤苞苴盡絕迨兩江遷鎮一節罔渝馭下則大革貪
風勵已則寒同儒素雖古廉吏曷以加茲廼倚任方殷
遂溘焉淪逝軫懷良惻異數頻頒於戲蕭然官舍竟擔
石之無存煥矣綸章庶泉臺之克慰苾芬在御尙其歆
承

惟爾苦節克貞鞠躬匪懈真一介之弗取越數官而彌
堅奄忽云亡能無憫焉於戲清風未遠長存表德之思
寵卹重頒丕著旌賢之典爾靈不昧其克歆承

御製詩賜四川布政使臣于準

偶成五言絕句

石岸衆芳靜斜陽柳色邊揮毫意獨遠魚躍在深淵

御書額聯賜江寧巡撫臣于準父贈光祿大夫臣于廷翼

紹德貽謀

一經式訓光先業屢錫承恩裕後昆

御書額賜江寧巡撫臣于準母封一品夫人張氏

壽幛恩永

御書額聯賜江寧巡撫臣于準

敷惠寧人

愷澤三吳滋化雨節旄再世繼清風

勅諭陝西臨洮道按察司副使臣田呈瑞

茲命爾整飭臨洮道管理平慶臨鞏等處驛傳事務駐
劄蘭州管轄臨洮府蘭州河州狄道渭源金縣及臨河
蘭三衛境外歸德所地方其衛所經管錢穀各官仍照
舊聽爾統轄首在撫綏黎民勤宣德意約束衙門官吏
胥役使之恪遵法紀無致作弊生事擾害官民監司本

源既正方可表率屬員用循職業宜加意修濬城池積聚糧餉捕緝盜賊稽查逃人仍誠諭有司簡訟清刑潔已愛民生聚教訓共圖保障凡係流移人戶須設法招徠各復本業不許奸人借端詐害如大兵征討經由地方糧草舟車皆當通融預備以得臨時支給事竣報核毋容有司朦朧橫派重困小民爾仍稽核州縣衛所民屯錢糧專理廢藩一切租課其平慶臨鞏驛傳屬爾專理須稽察驛站錢糧核明報銷察驗勘合火牌及時應付其枉道騷擾違例需索等弊如法究治至所轄臨鞏二府鹽法宜督催各屬鹽引按季完銷所屬官員有貪

殘溺職者轉報該督撫叅處爾仍聽督撫節制年終將行過事蹟開送該撫咨部察考爾受茲委任須持廉秉公殫心竭力使小民樂業斯稱厥職如或貪黷乖張因循怠忽貽悞地方責有所歸爾其慎之故勅

世宗憲皇帝

御書額賜贈太僕寺卿汾州府知府

臣

黃廷柏

成仁取義

汾州府志卷之二十八

藝文二

郭有道先生墓碑

漢蔡邕撰

先生諱秦字林宗太原界休人也其先出自有周王季之穆有號叔者寔有懿德文王咨焉建國命氏或謂之郭卽其後也先生誕膺天衷聰睿明哲孝友溫恭仁篤慈惠夫其器量宏深容度廣大浩浩焉汪汪焉奧乎不可測已若乃砥節礪行正道正辭貞固足以幹事隱括足以矯時遂考覽六經探綜圖緯周流華夏隨集帝學收文武之將墜拯微言之未絕於時纓綬之徒紳佩之

士望形表而影附，聆嘉聲而響和者，猶百川之歸巨海，鱗介之宗龜龍也。爾乃潛德衡門，收朋勤誨，童蒙賴焉。用祛其蔽，州郡聞德，虛已備禮，莫之能致。羣公休之，遂辟司徒掾，又舉有道，皆以疾辭。將蹈鴻崖之遐跡，紹巢許之絕軌，翔區外以舒翼，超天衢以高峙。稟命不融，享年四十有二。以建寧二年正月乙亥卒。凡我四方同好之人，永懷哀悼，靡所寘忘。乃相與推先生之德，以謀不朽之事，僉以爲先民旣沒而德音猶存者，賴之於見述也。今其如何而闕斯禮，於是樹碑表墓，昭銘景行，俾芳烈奮於百世，令聞顯於無窮。其辭曰：於休先生，明德通

元純懿淑，靈受之自天。崇壯幽浚，如山如淵。禮樂是悅，詩書是敦。匪惟撫華，乃尋厥根。官牆重仞，允得其門。懿乎其純，確乎其操。洋洋縉紳，言觀其高。棲遲泌邱，善誘能教。赫赫三事，幾行其招。委辭召貢，係此清妙。降年不永，民斯悲悼。爰勒茲銘，摘其光曜。嗟爾來世，是則是效。

徵士頌

二首北魏高允撰

行司隸校尉中都侯西河宋宣道茂

道茂夙成，弱冠播名。與朋以信，行物以誠。怡怡昆弟，穆穆家庭。發響九臯，翰飛紫冥。頻在省闈，亦司于京。刑以之中，政以之平。

廣平太守列人侯西河宋悛與廷尉正安平子博陵崔建興祖合頌
崔宋二賢誕性英偉擢穎閭閻聞名象魏審審儀型邈
邈風氣達而不矜素而能賁

上柱國梁府君墓誌

唐人失名

君諱思字恭其先安定人也昔秦仲伐西戎有功周平
王東遷封少子康於夏陽梁山因而命氏其後竦因才
著冀以榮稱禮樂弓裘千載不墜曾祖志誠祖從政父
當意並立言立德爲龍爲光前史詳矣君幼重儒素長
好交遊義及友于信誠鄰里不羨榮貴以素琴濁酒爲
娛屬荒郊有事大國用師公奮不顧身掃清邊鄙特蒙

累功加上柱國錦衣綵服宗族爲榮於戲四時流謝易
往難追優哉游哉聊以卒歲大歷十二年七月三日邁
疾終於家也春秋八十有七夫人清河張氏閨闈秉德
婉孌宜家蓬首終身不移霜操廣德二年八月八日奄
然長往公有二子伯曰崇壁次曰廣濟孝情克著追遠
思深遂展靈儀旋開兆域以貞元九年歲在癸酉十月
十四日卜麟鳳福慶之穴得鷄犬鳴吠之辰合葬於平
遙城西北一里舊塋禮也辭曰寒郊十月四序旋周白
日朝暗黃雲暮愁蕭蕭壙野鬱起荒邱人世此謝泉臺
路幽雖餘剎石萬古千秋

汾州府志 卷二十一
狄武襄公神道碑銘

宋翰林學士王珪奉詔撰

汾晉之氣蒙於崆峒。有如其人。武襄之雄始來京師。感慨從軍。以節自發。孰莫不聞。元昊蓄姦。歸節塞下。西邊用兵。露甲在野。公出大里。至於杏林。奇謀縱橫。以警戒心上。顧將帥。威名無如來。汝陪予秉國之樞。盜起南荒。乘邊弛防。陷邕圍廣。妖氛以猖。公於上前。憤然請討。賊失崑崙膏血。原艸還服。在廷越茲累年。夙夜廼事。匪圖弗宣。將相出藩。年甫五十。公不復還。天子爲泣。生莫與榮。歿莫與哀。旂常之載。其績有來。有勤其初。有大其後。著德於詩。以質不朽。

贈尙書祠部員外郎文府君墓誌

宋文彥博撰

夫水之有源源出之深者。其流長人之本祖。祖德之厚者。其嗣昌。噫。源深德厚者。見之吾祖祠部府君矣。君諱銃。字挺之。本性敬。當晉室。以犯高祖御名。改賜今姓。取文象也。至聖朝。以避翼祖廟諱。遂不復舊。有媯裔。遷於齊。子完之孫。以謚爲姓。自時厥後。胄遂益蕃。或占籍於平陽。或流居於蒲坂。八代祖太尉平陽王。有大勲力於中宗。載於國書。可考。太祖晤。太和中。由鴻臚丞。辟北都留守判官。曾王父穉時。以明經中第。守汾州叅軍。未幾留判。歸老於西河。叅軍榮侍於膝下。且又嘉是山水。樂

其風土乃自河東縣之同果里徙居於是故府君今爲西河介休人也王父沼澤州錄事參軍烈考崇遠長興中守遼州平城簿與晉高祖有豐沛之舊天福初龍興大夏鳳起晉陽遂以協贊之功亟昇出宰之任授代州崞縣令稍遷并州太谷令帷幄之助居多而綿上之封蓋薄方將偕隱以保天和屬劉氏偏羈於太原選用俊賢縻以要職而又兩宰劇縣再更都轄而考終於家有子二人其長蚤亡府君卽其次也始以蔭補郊社署丞尋辟石州軍事推官太平興國中武車載駕王師有征後主率并民因壘太宗皇帝需陽春之澤封歸命之侯

凡劉氏之舊臣率度材而被用時府君方以旣退便於家居且以頤養爲懷無復出入之意雖詔書搜訪州司敦遣竟以疾辭不克上道常以杖履浮沉於鄉里頗用文酒燕樂於朋友故與進士溫夢說詩舊崇果詔休輩有世外莫逆之契藥餌弗驗壞梁斯及以至道二年九月三日啟手足於晉陵里之第享年五十有三府君始娶王氏故戶部郎中丕之女也生慶善之門稟柔懿之德天奪其筭先府君而亡有子三人長曰泊今爲司訓員外郎荆湖南路轉運使次曰淳郊社齊郎次曰淵未仕而亡有女一人適史氏再娶郭氏有子一人曰渭府

汝州府志 卷二十一
君以長子登朝邁慶凡四追命爲尙書祠曹員外郎夫人追封臨沂縣太君娶耿氏有子一人曰彥博卽府君嫡孫天聖五年春進士甲科今爲殿中丞知并州榆次縣權倖西河郡事而耿氏早亡亦以彥博預殿閣之引籍邁農壇之展禮得援恩例追封扶風縣君再娶王氏封永樂縣君有子一人曰彥若應進士舉有女二人長適將作監主簿鞠齊鄉故天章閣待制咏之子也次適進士成偉殿中丞元吉之子府君之次男淳始娶郭氏冀氏皆早亡今娶武氏有子四人長曰彥先次曰彥國其次幼滑娶王氏斯皆府君貽謀積德之至厚故子孫

錫美流光之寢昌也彥博之生也後不逮事捧遺規以出涕瞻畫像而下榻嘗立侍於父叔因習聞於話言曰惟府君局量宏深性資端厚德行著於鄉黨仁愛洽於族姻希蜀嚴之沉溟達羲易之素履善教諸子俾紹家聲惟以清白傳家不以產業爲事識者以府君爲林宗干木西河之後出也所不至者壽耳府君棄代之年權窆於里第之西原今卽真宅以明道二年十月十七日乙酉得吉卜於靈石縣之孝義原祖母臨沂太君先葬於介休之西原陪祖之舊封松檟美茂不復遷祔從古禮也禮曰銘者稱先祖之美表孝孫之心也庸刻沈礎

以識佳城銘曰王父之德柔嘉維則行有枝葉信著金石州黨胥化宗姻是式跌巖文石涵泳典籍美璞中存含華內蘊道屈當世慶流後昆祠曹追命密印推恩綿山南峙汾水東瀾吁嗟佳城茲焉寧止爰石勒銘徽音無已。

魏文侯墓碑

宋謝景初撰

嘉祐戊戌歲予爲吏汾州旣至考圖牒則曰魏文侯都之墓在孝義縣西五里東漢郭泰林宗之墓在介休縣東二里蔡邕作林宗碑在墓之側他日涉郡守園池見唐開元二十年孝義令楊仲昌所作魏文侯碑在焉其

旁記墓在勝水之陽與其周旋高大甚備至大中十年刺史崔駢自孝義移於此且盡敘魏之世系始卒於下而於州城之東大中佛寺北廡得林宗碑備刻二辭其一蔡邕之文其一記林宗後裔纖息不刻立碑之年載推本似隋唐間不知何時移置州城也予遂摹二碑畀孝義李令復介休間邱令訪求二碑已而得魏文侯之藏而林宗亡之矣蓋楊氏所建文侯墓側載述之詳也惜乎人知愛其碑恐暴露毀折而徙之不知其碑徙而墓夷也今林宗墓旣不可得幸而得文侯之墓如不表識久之則亦削平磨滅如林宗無疑也於是使李令改

石別刻楊氏之碑與其所記墓之所在周環高大并崔駢所列者盡鑿而立之墓側予是爲記其由庶幾可考矣。

論乞不勘狄青侵公用錢劄子

宋歐陽修

臣風聞邊臣張亢近爲使過公用錢見在陝西置院根勘其勘官所取干連人甚衆亦聞狄青曾隨張亢入界見已勾追照對臣伏見國家兵興以來五六年所得邊將惟狄青种世衡二人而已其忠勇材武不可與張亢滕宗諒一例待之臣料青本武人不知法律縱有使過公用錢必不似葛宗古故意偷謾不過失於點檢致誤

侵使而已方今議和之使正在賊中苟一言不合則忿兵爲患必至侵邊謹備邊防正藉勇將况如青者無三兩人可惜因些小公用錢於此要人之際自將青等爲賊拘囚使賊聞之以爲得計伏望特降指揮元勘官只將張亢一宗事節依公根勘不得枝蔓勾追其狄青縱有干連仍乞特與免勘臣與邊臣本無干涉豈有愛憎但慮勘官只希朝廷意旨不顧邊上事機將國家難得之人與常人一例推鞠一旦乏人誤事則悔不可追伏乞朝廷特賜寬貸邊臣知無功之將犯法必誅要藉之人以能贖過則人人自勵將見成功取進止。

賀文參政啟 宋歐陽修

伏以元膺制命參秉國鈞爰擇令辰已諧禮上伏惟慶
慰恭以某人學通繫表識照幾先懿文爲大國之光華
偉望乃一時之柱石上心所稟適符賚弼之祥輿頌載
喧久渴爲霖之望果膺寵數式副具瞻進退羣材運誠
衡之輕重調元和氣登至治於升平然後正台袞以代
天工列功勲而銘廟器符爲元志以重熙朝某幸在陶
鎔惟知慶忭商秋式序歲物方成伏請上爲邦家精調
寢膳

賀文相公拜相啟 宋歐陽修

伏審就降命書入持宰柄伏惟慶慰恭以某官際天蘊
識名世標才以文章甲賢科以忠義挺臣節華要之選
翱翔逮周素蘊內充所臨必最化行右蜀政貳中樞屬
邊寇之肆狂仗使威而殄滅暫形籌畧已取蕩平還居
廟堂副聖主仰成之意坐調鼎鼐洽羣生咸遂之和凡
被陶鎔皆知汴頌矧居庶列實倍常情

回文相公謝服闋入覲書 宋歐陽修

右某啟伏承榮奉制恩顯膺寵典伏惟慶慰恭惟相公
道兼文武功著鼎彝言行縉紳之表儀出入朝廷之輕
重自執至情而不奪勉從制禮之難逾爰被徽章遂趨

召節介圭來覲方優體貌之隆前席嘉謀卽正弼諧之
任寔繫士夫之素論豈惟朽拙之焉依敢謂謙摯特貽
誨翰感銘之至忻忭交深

回文相公辭起復使相判河南書 宋歐陽修

伏承光奉制書起從哀次未皇馳賀特辱貽函伏惟留
守太師相公望重縉紳道高巖廟出處之際繫中外之
重輕張弛有宜兼將相之文武蔚爲元老東在先朝雖
奉性之隆專守經而執禮而權時之制或以義而斷恩
副聖君仄席之思見忠臣許國之急諒難遵於固避幸
勉屈於至情修方與倉生同茲引領遽煩誨諭但極感

惊

又回文相公服除遷侍中移判永興書 宋歐陽修

又修啟竊承顯奉制恩薦膺寵拜伏惟歡慶恭惟太師
侍中器深宏達業茂經綸弛張文武之才出入將相之
任而日者來覲冕旒之邃喜聞履舄之聲從容話言固
多仁者之利體貌者哲是惟先帝之臣宜加異數之優
以爲一面之重雖方勞於憂顧藉有素之威名然而患
輕四支不足爬搔於蟣虱坐制萬里理當根本於朝廷
卽期廊廟之來歸始慰士夫之素望過蒙謙挹曲示誨
言趨賓屺以無由積累惊而徒切

代文潞公謝太皇太后表 宋張耒

稽留君命。敢求免於刑誅。惠養老臣。不使勞其筋力。仰
睿思之從欲。撫衰志以知榮。伏惟太皇太后。厚德無彊。
至仁在上。神孫臨祭。知係依之聖功。多士充庭。見肅雍
之盛德。恩及草木。喜同天人。臣幸以餘齡。獲逢盛旦。雖
邊豆駿奔之事。徒有心哉。而禮樂大備之時。爲後死者。
豈不偶爾尙足矜榮。

書狄武襄事

宋蘇軾

狄武襄公者。本農家子。年十六時。其兄素與里人失其
姓名。號鐵羅漢者。鬪於水濱。至溺。救之。保伍方縛素。公

適餉田。見之。曰。殺羅漢者我也。人皆釋素而縛公。公曰。
我不逃死。待我救羅漢。庶幾復活。若決死。縛我未晚也。
衆從之。公默祝曰。我若貴。羅漢當蘇。乃舉其尸。出水數
斗而活。其後人無知者。公薨。其子詠。諮護喪歸葬。西河
父老爲此言。元祐元年十二月五日。與詠同館。北客夜
話。見之。眉山蘇軾記。

宋將西征禱應克捷碑記

元符二年十月日牒

禮部申準。都省送下端明殿學士。大中大夫。河東路經
畧安撫使。知太原府。林希。劄子。奉近嵐石麟府西路出
師。進築堡寨。凡所過神祠。並令致祭。今據統制官王文

振等申石州明靈侯祐助王師皆有應驗不敢一一縷陳契勘明靈侯世傳趙氏元豐四年帥臣孫永奏爲祈禱有應先朝封號明靈侯經今二十年本路前後出師必有冥助今來王師進築靈應尤異伏望聖慈加封爵號庶使鬼神効職者亦被褒錄尙書省牒陳奉勅石州明靈侯王師濟河問罪西夏元戎慎奉有所於侯正直聰明惟順是助晉寧建壘遂合新秦我陵我阿民樂耕牧底茲勝績寔靈之休進封貴公秩冠五等永福并土尙其格思可特封明靈公至牒

潤濟侯廟記

宋知汾陽軍事周焯

宣和元年夏五月今提舉秘閣開封李公始領河東水事會天久旱川流涸竭而修楠巨梓積於汾之境內者不啻數萬計是時朝廷有大營造詔令絡繹公夙夜敦促懼不時進而焯領郡纔踰月承命靡安殫思竭慮殆非人力可及乃詢父老求神之有功於民者將禱之咸言距州三十里有祠曰賀魯將軍在後魏嘗屯兵山下水遠士渴馬跑地出泉今疏其流溉田數千頃歲時亢旱有請必驗焯乃涓日詣祠默與神約且曰惟神廟食茲土有赫厥靈能於此時回枯借潤激三尺之波寬萬夫之力吏得逭責敢忘神休史奉祝讀未訖有雲蔽空

來庭廡變夕翌日大雨綿延浹旬一川澎湃汹汹然若
擁千兵萬馬如昔時於是圓若楹者方若椳者曹雜而
相依若橈者喬傑而特出若棟與梁者結桴聯筏首尾
相銜屬邑晏然不勞而辦郡以狀言公異其事抗章請
封以爲神寵有旨進五等爵是爲潤濟潤濟之命寔自
公啟初祠無額崇寧間郡將許侯上神之功朝廷始以
永澤榜其廟時有紀其事曰微名之建焯焯煌煌當有
來者繼今以請後十年乃有是封是豈無待而然邪郡
人素嚮神平時祭賽惟恐後聞公爲請樂之遠近出金
帛以佐完繕者日相踵由是神宇加新威靈益熾汾再

歲大稔神有力焉焯嘗謂神依人而行而人亦賴神以
濟二者常相須亦各從其類也是以聰明夔亮之神必
忠孝端莊之是聽故曰靖共爾位正直是與神之聽之
式穀以女又曰靖共爾位好是正直神之聽之介爾景
福公以靖共飭身以正直將使事乘輅攬轡不憚寒暑
而藹然忠孝端莊譽孚於上下是宜神之聽之其效如
此故一歲之間華資沓進乃知天子式穀而神介之福
公有以取之也焯以守臣備詳靈貺且慶公能發揚隱
德以聞於朝廼爲序其本末刊寘廟左

超山神祝文

宋知汾陽軍事周焯

維宣和元年歲次己亥十二月癸酉朔初十日壬午中
 奉大夫知汾州軍州管勾神霄玉清萬壽宮管勾學事
 兼管內勸農使兼點檢牧馬事借紫金魚袋周煒謹以
 清酌庶羞之奠敢昭告于應潤之神惟神惠澤一方民
 蒙其福狀聞于朝以彰休德錫以應潤顯揚厥功煒職
 守茲土獲庇良厚謹遣宣教郎知平遙縣事余彥和涓
 辰致禮明告于神伏惟降監尚饗太守周公守郡之首
 年朝廷以本部起山
神靈應頗著乃賜廟額然額既頒又太守周公親出祭
 文俾邑長余公往告焉標黍周公門下之屬僚也懼斯
 文泯缺無以流播盛美爰刻堅珉用傳永久宣和二年
 三月立石忠翊郎權縣尉趙安平迪功郎權主簿管勾
 學事張公厚宣教郎知縣丞管勾學事
 張標宣教郎知縣事管勾學事余彥和

勅賜應潤廟記

宋平遙縣知縣余彥和

并汾古良郡也惟平陶介於二大國之間又號為劇邑
 邑之南五十里有山焉名曰超山勢高且厚下視邑城
 山之巖有泉出焉源雖微挹嘗其味清涼而滑甘耆老
 相傳歲遇旱禱於茲未嘗不應彥和試吏茲邑連二歲
 春夏旱率三禱皆應如響泉之旁雖舊有祠而圯壞不
 修榛莽不除因喻所居之民完而葺之民自赴功不日
 而成廟宇既崇復思名號不立非所以盡報神之道且
 自古有功德於民者皆載在祀典故因功德以立名號
 所以報神於無窮也彥和具以事狀白郡守前後凡再

請皆齟齬不克行。及周侯領是邦也。父母其民。民之所欲。無不從之。於是彥和再狀其事於周侯。卽請於朝。乃錫以應潤名廟。嘗考易之繫辭曰。雨以潤之。書之洪範曰。水曰潤下。茲山之泉。能出雲爲雨。有雩必應。是宜得斯名。而有以祀其功也。今聖天子道格皇天。德被黎庶。日雨而雨。日暘而暘。年穀屢登。海內豐庶。至矣。然猶以道寧神。懷柔之禮。無不備盡。故山川鬼神亦莫不寧。非特寧處而已。又能受職效靈。以濟萬物。豈非懷柔之效歟。號稱旣降。周侯復作爲祝文。遣彥和卜日齋戒。祭告於祠下。是日闔境之內。老幼畢至。莫不歡呼鼓舞。咨嗟

太息。謂非我侯不能克成乃事。咸願紀其歲月。俾後來者知我侯之惠愛及民德。無愧於神。而神之食於斯民。永永無窮也。功無愧於祀典云。宣和元年十二月初十日記。

修清虛觀碑記 宋謝惇

三晉之地。古爲冀州。北接燕代。據鴈門雲中之塞。東達趙魏。帶太行碣石之險。大河界其西。汾水貫其中。堯之所都。晉之所封。唐之所興地也。澤潞以北。平川千里。鼎足分峙者。并晉汾。而汾之爲州。地高氣爽。土厚水深。其民淳且重。桑麻之沃。秔稻之富。流衍四境。汾之盛也。漢

唐以來將相名臣古今相望汾之英也而平遙爲汾之
佐邑其民純儉節用有堯舜之風慷慨好義髣髴子夏
干木之遺烈况夫山川秀麗物產之富庶人物之雄邁
而道家之居至於卑陋而不修非所宜也清虛觀建於
唐高宗之末年觀名太平天祚中嘗葺之本朝錫名清
虛百餘年來廢壞不修日月浸久惟元始天尊像僅存
焉旁穴上穿不庇風雨四無牆垣過者直入罷民遊手
攘竊蒲博聚爲淵藪則所主者非其人也其後得道士
武太文居之太文質直而好義凡觀之田有所收入用
以修完棟宇瞻給往來秋毫不私於已惻然悼觀之廡

廢經營攬集不避寒暑人知能完其居也朝散大夫裴
公憫太文之有志自捐其資以成就其所欲爲而公節
操行誼素爲鄉里士大夫之所信服故一出言親舊里
人與夫旁邑願相其事爭先恐後豪者獻財巧者獻技
貧者獻力而觀爲之成於是增大元始天尊像而益之
以道君老子之像又爲小殿四一以奉玉皇十二曜列
焉一以奉北極十二元辰列焉一以奉天地水三官一
以奉真武而北斗列焉凡道堂庖舍無不修整今之過
其前者觀其大廈輪奐金碧昭曜出於頽垣廢屋之後
庭除潔清壇墀完具出於荆榛白露之中黃冠雲來步

虛逍遙大異前日之呼嘯喧囂也。太文誠有力焉。然非公以信義率其鄉邦。汾之人慕道奉善。亦不能化舊而爲新。於是觀之興。遂爲西河之巨麗矣。自三代之後。世衰道微。然後道家有助於世。故有爲紛更。然後知清靜不擾勝焉。馳騫夸奪。然後知不爭無欲勝焉。欺誕矯詐而真者勝焉。縱橫排闔而默者勝焉。故老子謂絕聖棄智之說。將以還淳返樸而已矣。漢之文景。尙黃老之學。止尊其說。崇奉之典。闕如。至於唐祖老子。本朝始大其棟宇。華其像貌。崇奉之儀。日以嚴潔。是以茹芝煉丹。蟬退而羽化者。歸焉。吐故納新。熊經而鳥伸者。歸焉。以至

福之可祈。罪之可弭。亦歸之。然後其教有以興。而其徒有以盛也。觀之成功。屬武當從事謝悰爲之記。因識其風土之淳厚。觀宇之興廢。與道家之爲教。載之於石云。

汾州平遙縣葬枯骨碣銘并序

金李致堯撰

蓋聞衛國風之詩曰。凡民有喪。匍匐救之。周小弁之雅曰。行有死人。尙或瑾之。是知死葬之禮。古今所重也。然生死異路。而苦死者。其理堪哀。非生者孰爲埋瘞。壽夭殊途。而橫夭者。其情可憫。非壽者孰爲薦享。噫。枯骨者。寔橫夭而苦死者也。亘古以來。間或有之。或遭饑饉之難。或值刀兵之劫。或溺大水。或焚烈火。賢愚罔間。貴賤

無分若崑岡火炎玉石俱焚致使屍橫於地穢達於天無人收葬深可悲恤且兔悲狐死謂傷類也況至靈於禽獸者乎巷埋里葬乃常禮也況其間有親知者乎昔潁川黃霸造棺而葬窮氓校尉曹褒買地而葬無主陳寵賢守也案行葬洛縣之骸骨致哭聲而盡絕孔車長者也冒法葬無親之誅者遂聞上而嘉稱古人若是德被羣靈名垂後世顧不偉歟本縣頃自丙午歲季秋二十一日大軍破城時有援兵五千人遺民數百戶內外生靈約計十萬或長驅不返或迎敵而殂威臨而墜井墜河者有之勢協而自刎自縊者有之士民共戮善惡

同誅有千里而離鄉者有一門而盡歿者屍盈郊邑血滿道途觸瀆天地暴露星霜日往月來股分肉盡親知莫辨男女無分白骨交橫孰可忍邪於是時也僕雖唇齒傷刃幸老幼全生二親遊宦千里歸鄉仰承天地之洪恩深懷螻蟻之謝意至甲寅歲敬從父命與衆特推悲懇哀矜枯骨命工僱力遠收近拾數月之間聚一千五百餘副於中秋十三日卜葬於城西北五里古大墓之北春秋祭享以時不闕嗚呼風吹雨灑淺土尙多未經葬者依青暴白耳聞目見僕等於丁巳歲徧向郊原廣收遠掇半載之間又得二千餘骸於中秋二十七日

葬於叢塚之西。歲時祭焉。至辛酉歲，因井中淘出屍骸五十餘副，於城南浮土耕出軍屍七百餘副。及裏外井中水浸者，命土人淘出二百餘副。諸處尋收，又得一百餘副。於上秋二十五日，葬於前墳之南。時並祭焉。凡此三禮，盡出羣誠，謹書於石，庶永其傳。而作銘曰：哀哉亡靈，生逢運劫，不意天心深懷忠節。師震雷霆，器橫霜雪。城破家殘，父離子別。避刃者殂，迎敵者折。河井漂流，刎縊交列。驚戶幾歸，敗軍殄滅。千里而來，一門盡絕。不分士民，莫問愚哲。徧地橫屍，滿城流血。郝勇戰亡，彭機計竭。渾歿堯臣，空悲孝烈。嗟爾英雄，嗚呼夭折。我輩推誠

哀收痛掇，廣萃羣骸。連開數穴，葬禮三修。醮筵屢設，春秋以時。祭享不輟。日落風悲，雲愁霧結。鬼泣神號，猿啼鳥噎。寂寂悲墳，煙鏤明月。皇統壬戌歲上元日，立石鄉貢進士李致堯撰并書。施墳地田贖收，拾枯骨梁琮。閻獻王德成、深史協、張得柔、劉道冲、閻彥冲、郭儀封。

開廣濟民渠記 金張元詰

國之本在農，農之資在水。水之爲利，廣矣大矣。原其性之潤下，功之濟物，而注瀉無窮，周流不息。淪浹之道，詎非溥哉。孝子河者，發源孝義之西山百餘里。一水自高唐之西北，會於白壁之左，次南二水合流，四派縈紆，遶

郭東注入於汾其於常也救旱之功爲最郊之西南層巔崇邱屬溪駢壑經積雨支流吞併洶湧之勢洪波怒濤不下三二丈邑東卑下之田烏鹵之地變爲膏腴民寔賴之自正隆二載雨不時降邑民蘇仲禮世習儒業宋淇精通算術以積水窺管知地形高下二公慨然相謂曰今之大旱編戶愁歎孝子河岸高百丈開崖穿動流渠行水糾多工成之可以救旱今雖不及興嗣歲不亦可乎聞者忻從集功七十五公以已錢代買渠地十餘里費千餘貫就藥家里河口三處卜七月十九日啟土率衆渠長監部入役莫不相勵而樂爲之導及邑之

東北司馬里上下二十里中間地之突者削而平坎者積而坦堆阜者鑿而深之缺窪者補而完之斷岸則剝木爲槽以通焉積工至次年四月二十五日落成三年月日也牛車併人力總二萬二千衆工孫奇等推舉二公作都副水頭立券分水酌之沿渠枯骨以瓦棺葬於寺之陰會朝廷賜廣濟院二公及衆工相謂南北地八晦施院下所葬枯骨利及幽冥名渠以廣濟不亦宜乎且田之瘠者一溉之效稼穡如雲變磽确爲膏腴轉貧窶爲康阜此濟之廣又可知矣夫先王之治天下也始於一夫之遂成於萬夫之川有瀦以聚之有防以泄之

史起導漳水以灌鄴自公引涇水以注渭民自今歌之
今二子建一時之功垂萬世之利寧讓前賢之嘉績也
哉同時導河者五仇家里王家里仙開觀龍渠皆不就
獨此渠成焉則二子之功尤有不朽者爰是紀其始末
俾後世知創始固難而成之非易易也

重修儒學記

金汾陽軍節度使李山

汾於河東號名郡文風不替蓋有卜段之遺焉州學宏
麗年遠寢成荒圯殿宇傾漏齋廡疎剝殆不蔽風雨西
廊四楹舊缺未備樓觀欹斜危不可登生徒講誦未見
安所學之前後雖有輸租隙地而歲入無幾莫償補治

之資以故居者相仍坐視彫敝同知節度權州事康侯
玉潤甫下車顧瞻恐懼思爲作新之而貲用缺如會州
有捕盜徵賞錢五十餘萬寄貯公帑侯曰用是以新吾
學可乎同職者從而勸之議遂決卽委學正王大純率
禮案主吏郭瑀併取地租見在傭工市材以甲申六月
乙丑始事至七月癸丑畢工欬者正破者完無者增敝
者飭殿堂廡宇煥然一新自文宣版位至於鄒克神座
各施羅幌黃紅有差壁繪七十二賢就加彩色駕輓之
前闕爲六齋分序兩廡卽至墻垣甃墁之飾版閣門窗
之具無不整嚴不費於官不勞於民汾之庶士未見斤

谷之施畚鍤之運而功已成嘗謂材之難於天下久矣君子施政固自不同才小而覺雖不出位猶患未周才大而敏至於餘事無所不辦僕日觀勝事賞侯之才有餘且知風俗之原也喜而爲之書

嘉禾記 金姜國器

天地之間賦象成形者有萬不同而以罕見者爲祥如麒麟之於走獸鳳凰之於飛鳥上則慶雲甘露下則醴泉芝草類皆不常出則所以爲瑞也嘗考諸圖牒卽其實而較之獨嘉禾最爲上瑞何則嘉禾者穀之精也穀者生民之命有國之寶政之急務也夫穀之精英者出

則百物阜成其可知已借使年穀不登民有饑色雖麒麟在郊藪慶雲甘露出於天芝草醴泉出於地則將何益是知嘉穀之爲瑞大矣哉然則彼物果何爲出也是豈人力之所能致邪是豈造物之偶然邪蓋嘗聞之和氣致祥又曰聲和則天地之和應今夫一郡一邑間豐凶之不同災祥之各異無不繫百姓之休戚百姓之休戚無不繫吏政之賢否吏政之失則百姓受弊怨讟充積邪氣姦其間不能無妖孽之作也吏政之善則百姓受賜懽忻交通流爲叶氣不能無祥物之應也昔魯恭爲中牟令政有異迹是歲嘉禾生河南尹袁安以檄勞

之曰君以名德久屈中牟。豹產之化流行天降。休瑞應行而生。乃上書言狀。帝爲之異。是以自古言賢令者。莫不以魯恭爲首。定胡小邑。僻在一隅。河濱山嶠間。風薄俗鄙者久矣。加之素乏賢令。尹恩澤不流。教化不宣。挾姦肆巧。愁恨歎息之聲。稔聞於田里。故向者旱乾水溢之患。無歲無之。大定甲午。文林郭君。河間人。諱震。字伯起者。奉命來宰是邑。痛矯前弊。其用心也公。其從政也果。其憂民也切。弱者扶之。強者抑之。姦民無所容其迹。巧吏不得措其手。未幾三載。政平訟理。向之乖爭凌犯者。化而爲禮義。昔之愁恨歎息者。易而爲謳歌。是以和

氣薰蒸。陰陽調。風雨時。一方之民。薦獲豐稔。丁酉。石州六縣被灾者大半。獨此一邦。歲則大熟。俄而有邑人白廣王詔。同日詣庭。而告云。有異穀二本。相隔數隴。合爲一穗。令矍然而語曰。信如是說。豈非嘉禾邪。乃率僚屬趨而往。視之。果祥物也。迎之以歸。於是闔境喧傳。觀者如堵。白叟黃童。無不舉手如額。皆曰。昔之水旱相仍。家室不保。今則樂歲終身飽。仰足以事父母。俯足以畜妻子。而又祥物顯應者如此。非吾縣大夫德政所感。其誰之力與。翌日。士民相率趨庭。奉酒而賀。不知手舞足蹈。而歌咏滿前。已而令乃顧謂士民曰。此一境間。兩獲上

汾州府志 卷二十一
瑞所謂美之又美者。非吾敢擅其美。今明天子在。上衆賢和於朝。萬物和於野。日月之所臨。舟車之所至。無不被潤洽而大豐美。故天不愛道。地不愛寶。所以嘉祥爲時而出。當與斯民同鼓舞太平。歌咏聖德而已。豈敢貪天之功。以爲己力。吾聞善則稱君。人臣之義也。昔唐叔得禾異畷。同穎。獻諸天子。周公旅天子之命。作嘉禾名之書篇。炳如日星。輝映千載。今歸美報上。適其時矣。乃緘禾于匱。仍圖其象。具表以獻。先聞于部刺史。部刺史達于州。自州而達于京師。上自侯王貴戚。縉紳士流。下逮民庶。爭先覩之。爲快。咸謂此瑞。天下和同之象。今荐

獲二本。乃太和之和也。自春官用事。從而太常禮官採撫故實。聞諸朝堂。乃于正月上日。稱觴之次。寶而進之。使驚動萬國耳目。爲一代美事。先以照符用下本所獻者。廻具聞前議。邑人相告曰。茲者上瑞並產吾土。曠百年未易逢此。上以見聖朝格天之德。高越於西周。下以見吾縣大夫政迹之異。不減魯恭之治。中牟使千世後知吾縣有是美瑞。吾縣長揚休。天子表獻之。力可不備。記以示諸後。

重建超山應潤廟記 金郭明濟

圖經云。超山在縣東南四十里。高三百三十六丈。峻越

餘山城塚記云平陶東南有過山是也唐天寶六年改名超山山之谷超谷也谷行十餘里中有佛舍百福寺也寺東有古神祠應潤廟也廟有井池乃禱雨取水之泉也宋宣和元年縣宰余彥和狀聞甘雨應祈之事因賜額曰應潤廟勅牒碑刻斯具存焉到今七十年矣大定十二年縣令蘭嗣吉亦祈雨卽應勅構喜雨亭於縣署以明應潤之徵也邇來自春徂夏雨澤愆期知丞權縣寇公大夫步至超山應潤廟取水祈雨因瞻廟貌毀舊殿廡摧圯祝曰如獲甘雨願輸俸錢修完祠宇感而遂通雨隨水行信宿至縣三日而俾滂沱矣水還廟而

復雨世謂迴馬雨也由是觀之廟曰應潤豈虛言哉卽以清俸充修廟之費且闔縣鄉里願施瓦木人工者源源而來皆德政感神降雨所致如此寇公大夫字伯祥代郡崞縣人也自大定乙巳仲春來丞吾邑特權縣事庭無留訟獄無滯囚鄉無追胥境無盜賊優優然子無事矣乃廣廨署修學舍葺弦歌之南樓引渠水於東郭百廢皆起庶民咸和茲之營建制度爛然可觀前後正殿東西兩廡龜亭拜廳挾堂樓門繪塑一新皆寇公之所規畫也於是神有所來饗峯巒栝栢掩映左右爲一方之壯觀不其偉歟爲之記歲月以徵其實

